



Broj: 04/5,03/11-05-1-1648-2/18
Sarajevo, 21. 11. 2018.

PREDMET: Izvještaj o učešću Delegacije PSBiH u PSNATO-a u radu 64. godišnjeg zasjedanja Parlamentarne skupštine NATO-a, Halifax, Kanada (16 - 19. 11. 2018.)

Delegacija Parlamentarne skupštine Bosne i Hercegovine (PSBiH) u Parlamentarnoj skupštini Sjevernoatlantskog saveza (PSNATO), u sastavu predsjedavajući Nikola Lovrinović i član Delegacije Asim Sarajlić, učestvovali su u radu 64. godišnjeg zasjedanja PSNATO-a koje je održano od 16. do 19. 11. 2018. u Halifaxu, Kanada.

Tokom 64. godišnjeg zasjedanja PSNATO-a razgovarano je o brojnim izazovima savremenog svijeta. Posebno interesantna rasprava vodila se o aktuelnom stanju transatlantskih odnosa, o ulozi Kine u stanju sigurnosti na sjeveroistoku Azije, o sigurnosnim izazovima koje sa sobom nosi sadašnje stanje u Sjevernoj Koreji, te o stanju u regionu Crnog mora. Razgovarano je i o sigurnosti energetske infrastrukture u regionu centralne i jugoistočne Evrope, kao i o stanju sigurnosti na Zapadnom Balkanu.

Na sjednicama Političkog komiteta PSNATO-a vodila se rasprava o Izvještaju o stanju sigurnosti na Zapadnom Balkanu gdje su predstavnici svih zemalja ovog regiona učestvovali u izradi završnog dokumenta izvjestiteljice Raynell Andreychuk - Kanada. Određene primjedbe bh. delegacije na Izvještaj prihvaćene su i prije izrade konačnog izvještaja. Određene primjedbe na Izvještaj, BH delegaciji su prihvaćene i prije izrade konačnog izvještaja.

Konstatirano je da dijalog, regionalna i bilateralna saradnja nemaju alternativu te da će PSNATO-a podržati nastojanja koja vode ka međusobnom razumijevanju, jačanju ekonomske saradnje i nastojanju da se putem dijaloga rješavaju otvorena pitanja, posebno ona koja su opteretila zemlje regiona u protekla tri desetljeća. Na kraju rasprave konstatirano je da region, uprkos svim nedaćama i problemima, ide naprijed.

Učesnicima Godišnjeg zasjedanju obratili su se Rasa Juknevičienė, predsjedavajuća PSNATO-a, Rose Gottemeller, zamjenica generalnog sekretara NATO-a, i Talat Xhaferi, predsjedavajući Skupštine Makedonije, koji je govorio o aktuelnom stanju u Makedoniji te je zatražio podršku predstavnika zemalja NATO-a na putu njegove zemlje ka NATO-u i EU.

Tokom 64. godišnjeg zasjedanja PSNATO-a, Madeleine Moon, članica Delegacije Ujedinjenog Kraljevstva u PSNATO-a, izabrana je za novu predsjedavajuću Parlamentarne skupštine NATO-a.

Delegacija PSBiH imala je niz bilateralnih susreta s delegacijama zemalja Zapadnog Balkana i jugoistočne Evrope, gdje posebno treba istaći visok nivo razumijevanja s članovima delegacija Crne Gore, Hrvatske i Srbije.

Nikola Lovrinović, predsjedavajući, i Asim Sarajlić, član Delegacije PSBiH u PSNATO-a, u Halifaxu, Kanada, susreli su se s Madeleine Moon, novoizabranom predsjedavajućom PSNATO-a. U srdačnom razgovoru s Lovrinovićem i Sarajlićem Madeleine Moon iskazala je snažnu podršku Bosni i Hercegovini i njenim građanima u nastojanjima koja čine da se ubrza evropski i euroatlantski put.

Svjesna teškoća koje prate aktuelno stanje političkih odnosa u Bosni i Hercegovini, Madeleine Moon je pozvala političke lidere na dijalog i hrabrost u preduzimanju koraka koji će dodatno stabilizirati i ekonomsku situaciju, te otvoriti prostor za bolje međusobno razumijevanje i dijalog.

Pošto je tokom proljeća ove godine posjetila Bosnu i Hercegovinu i zemlje Zapadnog Balkana, pozvala je i na jačanje bilateralne i regionalne saradnje zemalja Zapadnog Balkana koje, prema njenim riječima, imaju perspektivu ako učine dodatne napore ka međusobnom razumijevanju.

Izvještaj sačinio:
Sekretar Delegacije
Željko Grubešić

PREDSJEDAVAJUĆI DELEGACIJE
Nikola Lovrinović